

استاد اعجاز

عبد الباقی



سلك عريان

الشاعر

سمير عبد الباقي

رباعيات وربع

إسم العمل : سلك عريان

التصنيف : شعر عامية

الشاعر : سمير عبد الباقي

رقم الإيداع

٢٠١٦-٢٣١٦٥

الترقيم الدولي

٩٧٨-٩٧٧-٦٤٩١-٤٩١-٤٣-٤

الطبعة الأولى نوفمبر ٢٠١٦

إصدارات دار إبداع للنشر

مدير الدار : عادل أمين

٠١١٥٥٠٥٠٠٨٩

سلك عريان

٤

• لازم وبكره أكيد
ح يتم شىء ما ..
أعتى الجبال ينكسر
لازم بشرخ ما ..
الكذب قادر و لكن
قدرة محدودة.
و الليلة سودة
و ح يبدها ضى ما ..

..
قوم صلى للشمس
شِعرك هزّ قلب ما ..
*

• عملت منى (مواطن)
فسل بلا لازمة.
لاحلّ ولا ربط ليّه
فى يسر أو أزمة ..
حسب ماتسمح لى ..
أهتف لك بطول العمر ..
و اشرب المر و أرقص
يوم تقزقزنا ..
..
كاتم ! لحين ما تقع
صورتك و (بالجزمة) !
*

● الغزو البدوى ماكانش
عساكر جغرافيا و خيل ..
كان سيل من جهل و جنس
بيقتل فى القلب المواويل
حتى الرب تجلى فى علاه
خصّ الاعراب بالخصّة
و حباهم بالروح اللصّة
اللى تنجّس بالكذب طهارة النيل.

..

وتعكر دم المصريين
يستسلموا للقهر ف ذل نبيل.

*

• أمى قالتلى الغنى
هوّ اللى يستغنى!
وابويا علمنى أعيش
الشكل فى المعنى..
أبويا مات وامى ماتت..
والصديق باعنى..
واللى فجعنى :
إنه فرقنا اللى جمعنا!
..
مين فيكو لحنه برىء
يخفّ أوجاعنا !..
*

• فيضان من قهر
وذل وفقر وعدوان..
وسيول من جوعى محاريم
فى قسوة جشع الجرذان
دمروا أساطير الحوريات
وجناين (ايزوريس) وغيطان الريح
ورموا (ماعت) للتماسيح
وأحيوا قرايين دبح الخرفان.

..

شاهت فى قلوب الناس الفرحة
بحياتهم فى حضن الأوطان...

*

• اللى مضروب بالقديمة
لما (يُصفع) ينتشى
وانت راجع من
غيطان العيبة شبعان منتشى??
وجاى تقول مغصوب
وكان صعب الهروب?!
دانت من يوم
زلتك حالك مشى!!

..

الشريف لو حتى جاعوا
اولاده عمره ما يرتشى!

*

• الغزو لما فتحها
بدأوا التاريخ وياه..
بدال ما يمشوا لامام
للخلف خدنا وراه
إحنا اللي أصل الحضارة
فجر الضمير والفنون
شقت قلوبنا الظنون
ورضينا طمع الجُباه ..
..
نصلى للموت ضحايا ..
ونكره تجلّى الحياة..
*

• **بيهاجر الشعر**
زى الأنبياء فى النور.
ولا ينهزمشى قصاد
الأغبياء والزور.
وإذا ما شجر الأمل
كسره هجير الشرّ
فى بحر أو بر
يستقوى ببناات الحور!

..

أساطير خيال الطفولة
تهد أكبر سور!!

*

• من رد فعل قوة الأمل
فى رد الاعتبار.
الوضع منطلق بقوة
الصاروخ للانفجار.
فخفوا ضجة تحليلاتكو
الخايبة عن سيادة العولمة.
إذ إن ربّما سينقشع
ظلام الليل ده كله بالنهار
..
ومش بعيد سيستعيد
الفقر قدرته ع الانتصار.
*

• ابكى بدموع يا فتى
م الحزن ولا تخجل..
ضرب الغرض فى الوطن
واصابنى فى مقتل
حرموه ولاده اللى
لاخمينه بأمرضة..
من نسمة فيها الشفا
وأمل فى يوم أجمل!
..
و اللى افكرناه عقل
من صغره كان أهبل!.
*

• خسارة شعارات الثورة
غنيتها دماء المغدورين أشعار
وانتفضت بيها أرض التحرير
الأسفلت اخضرت أشجار..
هرستها جنازير الدبابات
وصادت عصافيرها القناصة
وعمل منها النخبة مقاصّة
غمّت غيامتها الأبصار ..

..

ليه كده يا شاهنדה يا جميلة
سلمى على جورج وعبد الغفار!.

*

• حبيبتى كانت فقيرة

زى نور الشمس

واضحة .. وصريحة

تحسّها بالّمس ..

حبّيتها منذ قرّيت

كتاب النيل!

عيني ياليل اتشبقنا

فى حبال الأمس!

..

وبنار بؤونه اتحرقنا

بكذب قهر اليأس!.

*

• الشعر مهرة حرون
لكن لفارسها تطير
حرة ماتفرقش عنه
ان كان أمير أو فقير..
ساعة تطاوع تواتى
وعمرها ماتهون ولا توالس..
ولا هيش لفض المجالس
ترضى بركوب الحمير
..
فابعد عن الشعر أحسن
لو فيك بواقى ضمير.
*

• نص البلد عسكر

على نصها ..

و لصّها سمسّر

فى ديك أمها ..

ولانه عايش

على نشف ريقها ..

ح يموت عافقها

من رغيّف همّها !.

..

لو منه أهرب

واتقى شرها !.

*

• فاكرينه يا اهل البصيرة
يامعدومين البصر.
فى قعدته ع الحصيرة
أو تحت ضل الشجر .
كان اسمه (عبد المجيد)؟
يجوز كان اسمه (العراقي)؟
طرح الغيطان الشراقي
طول عمره تحت النظر!
..
نسيتوه يا طرح المرارة
يا مضروبين بالبطر!

*

• حين تشوفهم مسروعين

إمشى على مهلك ..

وان شفتهم ملهوفين

إقبل عيشة أهلك

إضبط نَفْسَ عزتك

بالخطوة والايقاع..

هذا صراع أغبياء

لو يسحبك .. تهلك !

..

قدام غرور علمهم

ما اروعه جهلك!

*

• فلاح أرارى فصيح
من أهل مصر الزمان ..
وكان كما طمى نيلها
صريح كريح الغيطان..
كان اسمه (عبد المجيد
الخولى) - حد السيف!..
ولأنه ابو العريف
كلامه كان بميزان!
..
غدروه فى عز النهار
كنسوه كتفل الميدان!
*

• كسل الصباح عشق
يوهب روحى للعصافر ..
يرمينى أغرق فى احضان
الجمال وأطير..
كيف ماتنادينى
الذكريات استسلم..
والصمت وحده اللى يحكم
دفة المقادير

..

فجأه يساوى الجعير
بين الأسود والحمير

*

• نسيكوا اهاليكوا
وانتم دمكم دافى ..
إيش حال إذا مر قرن
وما زال الزمن جافى.
بتموت قلوب البشر
قهرًا وهُم ماشيين..
تايهيين ولا دريانيين
ان الوطن حافى
..
ع الشوك ولا فيه أمل
فى البلسم الشافى!
*

● الليلة شق القمر
على مهله فى قلبى..
زعلان فقلّب عليه
علّتى وذنبى ..
مع انه كان فى الصبا
على قلبى له شنشان..
فى السجن عشق وحنان
ينزل ينام جنبى
..
ليه ضاق علينا الخلا
فرّقنا يا صاحبى!
*

• دورك انتهى يا عبيط
فاقبل. بقيت كهنة
سيدك غواك ع الغويط
فُعمت بلا فطنة
عمتلى فرخ تفهم
ملاعب حواة الثقافة ..
وانت صنيعة الخرافة
جعلت م الكذب مهنة
..
وعشت رهن لدوسيهك
ظنك بخيبتك ح تهنا !.
*

• يا حق مالك رضيت
الافترا و الزور.
مديت حبال طاعة
لنورى وللمأمور.
لو كان حبيبك و صاحبك
صادق النية ..
ماكانش يفرح عشان
صبحت جناينك بور!
..
وكان يهد الحجارة
اللى تعلّى السور!
*

• بنيت لى زنزانه
فيلا دورين بتراسينه..
شرح هواها ترد الروح
لها جنينه..
وعملت سجان على نفسى
أدلعها..
أتاريه ماهوش برّه منّا
- السجن شىء فينا!

..

ياويله فنان فى دنيا
دنيّة و سجينه !

*

• ياللى انت ملهوف
تصلى ليل نهار دواليك.
طمعان بتخربها و متعشم
ح يغفر ليك ..
يا عم فكر ح تفهم
سر هذا الهبل ..
لو زحنا هذا الجبل
يبقى المصير فى ايديك.
..
دانت خرمت السما
ودوستها برجليك.
*

• بلغ يا طير
شكوتك للشجر ..
واشكى همومك
ياغيطان للمطر ..
أما انت يا جعر
فاكتم حارّ آهاتك ..
طرشه الحيطان
فاتك ميعاد السفر
..
إمتى ح تفهم
وتتعلّم لغات الحجر !
*

• كم عشت ميت
بتحلم فيه حياة ثانية.
فيها نهر خمرة و جوارى
وطواجن لحم بالبامية
وفازوا همة بهموم الحكم
وسلطة الكوانين..

وطمعوك يا حزين
و الحياة فانية !

..

يا حسرة امك عليك
لافيه آخرة و لا دنيا !

*

• لم لم جراحك وسلّم

للزمن ترتاح ..

عافرت ياما الليالى

ومالحت صباح ..

ياما حلمت ف صباك

تملك جناح الطير

وانت اسير معجزات

الظمى يافلاح !

..

آن الأوان للجسد

يقتع بماهو متاح!

*

• الله اكبر كبيرا
هلكننا الصحراء تكبيرا
وطلبنا م اللي ساقونا
غصب تبريرا ..
لا صحرا حنت
ولا كلاً السفوح زهر..
ولسه لازهر
بينخل عجة تفسيراً !
..
والخبز فى جرايته عفن
فكملّ نومه تشخيراً !
*

• راجع لبيتك كئيب
والقلب متعصر
والعمر عيشته
صاحب واجب ما بتقصر..
مين خرط القلب هم
وتبّله بالخوف ..
بلاه بقصر النظر
والشوف .. مايتبصر !
..
والغربة كانت زمان
فى حضنه .. تتمصر !
*

• وبكره ح يقر فصوك
فى جحر ضيق ضلام.
تقابل ابوك واخوك
ماحد بادلك سلام.
مع انهم كم شالوك
م الارض بالراحة ..
ماباقى غيرها مناحه
على طقطقات العظام ..
..
وانين حزين المشاعر
يزوم فى صمت الكلام ..
*

• الطير مادام طير
مغنى .. و الحياة ضيقة
تبليه بريح الفراق
يوم توعده بالقا ..
لكن يرفرف يعافر
و الجناح مكسور ..
حتى على المشنقة
ما يبطل الزقزقة !
..
رضا الخرس في الحقيقة
حجة للحمرة !!
*

• لا شيء في هذا الوجود

إلا يصلّى لشيء

زى الشجر للشمس

والقلب الشجى لصديق.

وانت يا كامل بعقلك

وبالخيال والتاريخ ..

بتشيخ فى عز الصبا

ليلك نهارك زعيق.

..

تدفع قرابين صلاتك

مرعوب بجمر الحريق !

*

• حبيبتي ريق العسل

مسكون بطعم المر ..

أنا قلت ورد الغرام

أشواكة ما بتضر.

عصرت له حَبَ قلبي

وما بخلت عليه ..

شفت الألم في عينيه

وانا ظنّى قربي يسرّ

..

طبع الحياة حرّه

تخلف وعدها للحر !!

*

● فيه بحر خمرة
فى طى الغيب بيستناك .
ياللى انت سكران
وفاكرها ان ماشية معاك
سايقها بالسّهوكّة
والهمبكة ع الكل ..
فتشوفها فل الفل
وقمرها ورا الشباك
..
لو يوم تزيح نخبتك
تلقى الملايكة وراك !
*

• القوة مهما افترت
لازما يجيئها اليوم ..
تنزف دموعها ندم
ماتشوفش راحة نوم ..
ياللى انت سطوة مهولة
وخطوة مهولة ..
ح تموت فى بحر العدم
مهما قدرت تعوم !
..
صاحب المزايا الجهولة
من الأمان محروم !
*

• ماتجيبش سيرة ربنا
وخلّيه فى حاله ..
خلينا خارج سلطته
وسطوة رجاله ..
الرب هوّ اللى بيرعى
رعيته ويصرف عليها ..
يحميها يرزقها ويغرقها
فى نعائم حلاله .

..

مش بسّ يرعبها
ويفتى بما بداله !

*

• نص البلد عسكر

على نصّها ..

ودا اللي من بدرى

قطم وسطها ..

لو كان بعتهم يزرعوا

الصحرا ..

ماكانش فلاحها

شحت قمحها

..

ولاخرس -

بين الأمم حسّها !

*

• هذا وطن من جبايرة
يذل عيَّانة.

ويدوس بجزمة مرابي
ف قلب غلبانه.

بحترنا في حبه
حَبَّ القلب ع الرصفان ..

وهو من يوم زمان
راهنّا لبرش سجانه

..

جفت من الجهل
منابعا في وجدانه

*

• صاحبة اليمامة تغنى
و كورس العصافير ..
نادولى : يا عم أصحى
وقول صباح الخير ..
الشوق شايل لك حقوقك
فى الغرام لساّه ..
عسل الحياة كالندى
لو ما قطفته .. يطير.
..
كم ياما نمت .. وندمت
على اللى راح .. ياسمير!
*

• أمضغ لبان الغرب

ولا تبلعوش..

كافة سموم الحضارة

فى دماه بتبوش ..

واقرا هموم العرب

ولا تغوص فيها..

اللى باليهم خافيهما

لجل ما يرتاحوش

..

إذ همّه خير الأمم..

لكن عمم و كروش

*

• أنا شلت في الانتفاضة

قصيدى كالشمروخ!

عثمان أرمم بشعري

في النوايا شروخ ..

لا الشعر سمع ولا حوق

في اهلى زجل ..

و لقيتني فاقد أمل

بذراع هشيم مملوخ !

..

و الكل هربان بجلده

في وطن مسلوخ !

*

• شرّخت حلقك دعاء
من أعمق الوجدان .
حملته آيات معانى
إيشى إنجيل و إيشى قرآن
شحنته من كل ما دفته
وما شربته و حسّيته ..
غنّيته .. رتلته .. صرخته
يوميًا فى كل آدان !!
..
وكنت من بدرى عارف
الكون مالهوش ودان.
*

• راهنت بعمرى وفكرى
وشعرى ع الشيوعيين ..
صاروا أصحابى وأهلى
وضىّ ونور العين ..
البعض جرحنى سامحته
وقدمت سلامة النية ..
لكنه (العلة المخفية)
دبحنى بسكاكين تالمين ..
..
لولاه إيمانى محصنى
لقتلنى غل المرتدين!
*

• كل الألام المستحيلة
فضل خيرات نعمتك .
حتى أحزاني الثقيلة
من بدائع خلقتك
طب واعمل أياه . طاوعت كل
من بعته يدننى ..
ليه ذننى بالرعب
جرّحنى بسيوف حجّتك ..
..
وفاتنى مكسور الجناح
من عجز فهم جبلّتك
*

• فى حضن أمريكا

كم برطعتى حرية ..

وفى العراق شيبتي

عيبتي بقيتي بعثية

وبتفتى دلوقتي

ركبتي زبيبة ودقن !

يا غريبة الشأن

إمتى تبقى مصرية !

..

ربك ساترها أكم

فضايح لسه مخفية!

*

• المخاوف علمتني
أعمل اللي اقدر عليه.
وذا ما العافية خانتني
يبقى عجزى منه فيه.
لا انا ح ابكى ع اللي فاتني
ولا ح افرح باللي جى..
أنا فى اللحظة دى حىّ
يمس قلبى اللي يناغيه!
..
دى بقى حكمة تجلّى.
للى ما فى ديون عليه!!
*

• عملتوا إية ؟ يا (صدّامين)

فى شعوبكو..؟

كسرتوا فى روحها شىء

داريتوا بيه عيبكو ..

جشع و جهل و بجاحة

لم ترد فى كتاب !.

وكان هايجة الكلاب

مسعورة فى قلوبكو!.

..

بقيت أشك إن لىكو

إله ..يحاسبكو !!.

*

• فيه إيه مصّحى
الخلق دى فى وجدانى ..
(شهدى) و(نصر ابوزيد)
(خميس) و(عنانى)!.
هيه الهزائم بتقلق
نومة الشهداء!؟
والا الجرائم راجعة
تحكم تانى!.

..

حافظ عليه البكا -
ورعب بانزف أغانى!

*

• على قد شمروخى
ناطحت الكل فى الميدان .
متحامى فى شموخى
و رفضى الذل فى الاذعان.
طاردنى كل اللى عنده
سلطة أرض و سماء ..
حالفين بجهل الغباء
يرمونى للنسيان

..

عاجزين يشموا و ورودى
سكرتهم فى كل مكان !

*

• متجمعين ع الجثة

زى الديابة..

بالطيارات .. وجميع

فنون الكتابة ..

لا الريحة قادرة

تمزع الأقنعة ..

ولا القسايد حاسة

شئ م الغرابة !

..

القتلة والانبياء

زعماء لنفس العصابة.

*

• قاعدين مع بعض
لكن كل حيّ وحيد ..
جامعهم الحزن
وكان اللي نفق دا شهيد ..
عادة قديمة مجاملة
أو دفاع .. ع الذات ..
مع ان قبل اللي مات
عشرات نسيتهم المواعيد
..
الناس قصاد بعض
تتعاقب بحزن جديد .
*

• هذا الزعيم كل ما
اتبسّم .. يبكيّني..
ودا باشوفه ف ملابسّه
الرسمى / يبكيّني..
ودا عينه لو جت فى عيني
يذلتى الإحساس ..
بأننا ناس بقر
من (فعل) تهجيني!
..
يا من عساه من شرف
رؤياه .. ينجيني !
*

• إيه خلف هذى السما

إلا العما و العدم ..

وإيه ورا حزنى هذا

إلا بعض الندم ..

كتبت ياما و خربشت

الصخور بالشبر ..

ماباقى إلا أتر حبر

من دم وجراح القلم

..

و بعض من نهنات

الشيب وآهات الألم.

*

• أهم رجعوا تانى
بخيانة وعساكر ..
وانت فى غيبوبة
مانتش مذاكر ..
ح تحزن .. ح تشمت
ح نفرح فى إيه؟
مصيرك يا بيه
رهن فتح الدفاتر !
..
ح تنكر؟؟ ماتنكر
عذاب جوعنا كافر !!
*

• نفسى انام حبه ارتاح
أو انام على طول ..
طمعان يكون خمرة و تفاح
وسماح وأنول ..
"كتب على نفسه الرحمة
يوم ماخلقنا !!"
ومستحيل أن يحرقنا
و هوّه المسئول!
..
مادام فى ايده مصايرنا
يبقى كده المنطق معقول !
*

• كرهت ريحة الورق
وملمّس الأقلام..
وباكون تعيس زى دودة
فى لحظة الإلهام..
طافحة شطوط الوطن
حتى الحلوq بالكذب ..
و الكبد وارم..
بايدز محارم الإعلام
..
فى ساحة الفن
ما باقى سوى الأزلام.
*

● مش قبل ما تقول ثقافة
تبقى انت أصلا مثقف .
تنزع ثياب الخرافة ..
وتملك القدرة تعرف .
العقل زينه و ممارسة
أخرس إذا كنت خايف ..
واحذر خيانة الشفايف
مادمت فى الأصل مقطف ..
..
حين الوطن ينسى نفسه
الكل م الكل يخطف !
*

• الخيبة لامه ..
التملية على الألاضيش..
بمب الفضايح يفرقع
بالونات و يطيش
ياللى عدمت الخجل
ياعقدة و شنيطة
اتدارى ورا حيطه
من عارك .. وردّ الشيش !
..
الناس ماهياش عبيطة
إن شافت التطنيش !
*

• حَقِّ نَفْسِكَ أَوَّلًا
وَاسْمِعْ لغيرِكَ.
الْحَقَائِقُ وَحَدَّهَا
رَاسْمَهُ مَسِيرِكَ.
إِبْنِ مِينِ أَنْتَ يَا فَالِحِ
فِي الْبَلَدِ دِي؟
عَامِلٍ / أَفندي؟ قَوْلِي ..
مِينِ فِي أَيَدِيهِ مَصِيرِكَ
..
إِوعَى تَغْضَبُ مِنِّي
وَاسْتَفْتَى ضَمِيرِكَ!
*

• شدوا الرجال العرب
والمسلمين للخلف..
فلت الزمان منهم
للمرة بعد الألف ..
اتوضوا واستغفروا
هتفوا وركبوا الخيل..
وكل صف تمطى
لجل يدبح صف !
..
وعلى عروشهم تمطع
كل بأف جلف !
*

• طول عمرك تهرب
للناس من لوعة ذاتك.
وكان ح يشفى جراهم
حرمانك من لذاتك .
جاي على باب قبرك
تنعى فقر نصيبك..
وانت اللي بجدران سجنك
حوطت حياتك !

..

اللي زرعته مر حصده
راجع مستنداتك !

*

• لكل أمه ليالىـ

سودا لا تُنسىـ

واحنا صباح ٥ يونيو

فاجئنا الحر بالنكسة

أمه من الرؤساء و الفراعين

وم الخلفا والمماليكـ

على شعب مزاريك

بذمة فريدة و موالسة

..

قالوها (مات اللي فات)!

اردم على الوكسة

*

• قلبك على الحزب
والا الحزب على قلبك
ياللى يادوب قد كشف
القبض .. بنحك !!
دايما لبحر الهزائم
موج و ريحة و رغاوى..
نزلت غاوى تعوم
غرقت فيه صاحبك.
..
خصما على الإنسانية
من حساب شعبك.
*

• يلاقيك ببسمة

فتتحير فى أسبابها.

زى المصلّى فى زاوية

فاتحة أبوابها.

سوا كنت مؤمن صحيح

أو كنت من داعش.

أو حتى لو كنت واغش

ح تتمحّك فى بوابها ..

..

من مدة والشعر خاصة

فعاش مرهون لأسبابها

*

• وكان قلمي طفل
هربان م الحصار.
دمّه بينزف ع الورق
آهات مرار..
أه يالقصيدة ياللى كنتى
زمان فرح..
همك صبح لهاليب
فى قلبى ليل نهار..
..
كنتى شفا لاكتتاب
صيرتى بديل الإنتحار .
*

• أنا طريد العدالة
العامية الألوان
مش بس عينها كليله
مافيش فى ايدها ميزان..
لكن قانونها الندالة
عشان دستورها عشوائى ..
نسيت ألف بائى ..
مصر منارة الأوطان..
..
ماباقى يحمينى إلا
إيمانى بالإنسان.
*

● ملعون يا داء العشق

حزن ومسرة ..

عصرت قلبي

وخفيت منها ميت مرة

قلبت ليه جمرتك

تكويني يا مجنون..

وانا قلبي عمره

ماكنش من برّه!

..

يفرح بذكري زمان

والرعب جاى بكرة!

*

• كتبت ميّات قصايد

كى تلوم نفسك!

ياللى انت عشت

الحياه سجين فى يوم أمسك..

دلوقتى مش باقى ليك

الا الحنين للموت

كيف راح تفوت يا غبى

مش راضى عن نفسك!

..

راجع دفاترك بجد

تشم الورد فى نفسك.

*

• نويت إنى ادندن
طقاطيق قباحة.

على لحن عريان
فى غاية الصراحة..
فلا عقل نافع

ولا عاد خشا

ذليل أختشى

الف ساقوا التناحة!

..

وهيبة الكراسى

حجج للبجاجة !

*

• كل شيء في الدنيا يقبل
يبقى ساعة الشعر – صورة
حتى ربطة فجل ناشفة
أو روايح قطة عورة
كل شيء نبضة وجود
كل شيء ومضة حياه
لما تبقى الروح مداه
تتجلى آياته جسورة .

..

جملة المزیکا تكمل
همس ولا تقبل مشورة
*

• باينه مصروف لنا
يامصر قفة حزن .
نشيلها مع بعض
نفردها بوسع الجرن
أنا انقطع نفسى
وانتى انقطع خلفك
البخت حدفك على قلبى
خدك بالحضن!

..

مع إنى بالعن مرار
حبك يا (ست الحسن)!

*

● المبادئ العظيمة
اللى عشت أمنت بيها
غيرت وجه الحياة
بس فجأة راحت عليها ..
لابقى (بروتاريا) يا ابني
ولا عاد فيه فلاحين ..
واللى كانوا مثقفين
أتوظفولنا وساقوا فيها ..
..
كل شىء بالعقل ف افهم
بكره حجتنا نلاقيها
*

• لا عدت طابق ألقح

ولا أرا عليك ..

كفرت بالحق

واستغفرت من بلاويك.

أنا ياللى ياما ضميرى

حمانى م الباطل ..

أصبحت عاطل

تعيرنى البهايم بيك.

..

أنا اللى كتكوتى كان

أول مايفقس ديك !

*

● كلام منعم متوازن
و مرتب المعنى ..
قرون طويلة نفسر فيه
لافهمنا قصده ولا جمعنا ..
ليانا ونهارنا نعيده
نلتّه لا نفهمه ولا بنزيده
يملا الوجود بالعدم
فيجف ابداعنا !
..
يقتلنا رعباً وعيده
واحنا عبيده اللى باعنا !
*

• عز الظلام الجهول
الجاهل الزنهار.
اللى ماكفاهش ليلنا
فطقتى ضي النهار
بدمى ح اكتب له شعرى
نجوم فى عز الضهر ..
تفضح أبو العهر
اللى حكّم فى الوطن تجار
..
باعوا لنا رمق الحياة
وباعونا للإستعمار .
*

• القتل والذبح والتهجير ده

شئء له زمان ..

بس النهارده صبح

عادة فى كل مكان ..

يا حضرة القاتل فى نفس

اللحظة صرت قتيل ..

كرهت كل جميل

عشان ابن آدم مايقاش إنسان ..

..

وربه سلم دفاتره

لمكتب الشيطان !.

*

• شجر الفرح فى حضوركو
يطرح الأحران..

و قدامكو يزرع صدا

القماحية فى الأجران..

يا معدومين الحساسة

.. ظلمتوا أرض النيل ..

وبكل همة وحماسة

قتلتم الانسان ..

..

الناس بقت نخل

خايخ - عدمت الإمكان ..

*

• عديت الوف من بحور

الشعر ما غرقتش

وان كان زرعت بها ياما

جناين نيل ما شربتش

الفن بالنيّه أصله .

.. وقلبك جميل ونبيل ..

لذا كان نصيبك قليل

و برضه ما ينستش .

..

حزنك حلالك بلالك

عشته ولا كرهتس !

*

• كل ام سكعوه قلم
على طول يدبير الخد .
كأنه من يوم حبا
ماصلبش حيل ولاقد .
والواطى يفضل مطاطى
ولو ركب مهرة ..
السلطة وهبت له قدرة ..
وشهرة مش على حد .
..
مع الخيانه الكنانة
بقت وطن بلا غد .
*

• جفت قلوبكم
ماعادت تحتمل أشعار
وعقولك سفت
فكرهت بهجة الأفكار..
فضلتوا وهج الخرافة
وراحة التدجين ..
وكلاً غيطان اليمين
وحواصل التجار ..
..
إيه اللي فاضل لكم
من عطر سيرة اليسار .
*

• قابض على الجمر
ولا الجمرة قابضة عليك
مش شايف النار
أنا شايف دماء فى ايديك
ضيّعت اهلك فى اسواق
النخاسة وضعت ..
رجعت والخيبة ضلك
والكذب غمًا عنيك
..
دى شيبه والا دى عيبة
وعُرف عيرة يا ديك؟
*

• م البالة شارى جاكته
يادوب بمقاسه..
وعايزها فكره اليسارى
تليق على ناسه.
يا عم راعى اللى جرى
انا قلبى مش طوعى..
حتى الشيوعى فقد
م القهره احساسه..
..
وجيفارا يوم اندبح
غدره بحماسه!
*

• جلسة فى مسرح عرايس

غاية فى الأتقان .

كل الرؤوس من خشب

كل الخيوط كتان ..

سُست وسلك وسفنج

مافيش حوار داير..

غير عجز همة دواير.

ليس فى الإمكان !.

..

م القلب حسرة بكيت

لإهانة الإنسان !

*

• صرت باموت
فى اليوم نوبتين ..
مرّة اما اصحى
ومرّة لو نعت لى عينين ..
ليه مستغربة منى بلادى
وانا اتغرّبت ..
كنت اما امشى اقول قرّبت
دلوقت مانيش عارف على فين!

..

مصر ماعدش هواها طيب
ولا دول أهلى المصريين !

*

• عارف ليه من دون الخلق
أصحابك داسوا مشاعرك .

لا بيراعوا أحاسيسك

ولا باقيين على عمرك .

الكل بيدور على نفسه

ده حقه .. ماتحمرقش ..

إنت نفسك جيت على نفسك

ولاقدرتش سعرك .

..

و اللي ماقدرش احتياجاتك

إزاي ح يتمن شعرك .

*

• كبير انت ..
بقد ما دُست على غيرك
وصاحب مجد .. بقد
ما اتشعبطت يا فالح فى مواسير
هذا قانون الصراع
فى غابة السلطة ..
يوم تلقى شلته
حتقبل كسر مناخيرك ..
..
ما دمت خمّنت
فين ح تدق مساميرك!
*

• طبع الزمان يلعب
على كيفية ملاعبه.
والحظ لما يواتى
يسحب فجأه يانصيبه.
مهما جريت أو عليت
ولا عترت تعبت
وكدبت ع النفس
ما ح تخلصشى من عيبه

..

صدقك مع النفس وحده
اللى راح يكفيك أكاذيبه !

*

• زر البطاطس بكام
يا حضرة الدكتور؟!
يا من هريت القلام
فى كتابة الدستور ..
عايرتنى بجهلى
واتشعبطت فى كتافى ..
لو كان ضمير صافى
كان كلمت لى المأمور ..
..
يحوش كلابه بعيد
يوم ما يصيبنى الدور !
*

• يا ريس الحى خفف
عن ضميرك .. مات ..
خلق الجمال و الشرف
جوه البشر إخوات
طفحت معاك العيوب
على الوجوه مسخرة ..
والجهل صار مفخرة
والسمسرة درجات ..
..
م الحسرة صبح الفقير
يبكى على الخواجات !
*

• ما عادشى عندى الصديق

اللى لما أغلط يقوّمنى ..

ولا رفيق الطريق

اللى لو أسقط يقيّمنى ..

كان لى بزمان الزمان

من دا ودا عشرات ..

مات اللى مات عمر فات

وكان قصدك تجرّمنى ..

..

يحاصرنى بحر الغرق

ولامين يعوّمنى!.

*

• أوراق التين على سذاجتها

بتخبى ثماره..

والديك الخائف من تعلب

بيدارى أثاره..

وزعيم الأمة اللى مُكمل

بجيوش وعقول ..

بمزاجه بيستدعى

عدوه لاستعماره !

..

مين المستحمر !؟

طب مين الجارى استعماره؟

*

• انت ممكن تبقى حاجة كبيرة

بالونة بلا جناحات تطير..

واللى نفخك عاش يعاير بيك

عموم الناس وهى بتستجير

بس أقصى ما الهوا بيشيل

هوا صورة وصوت..

ولد موت على شك ابرة

بغزه واحدة ينفجر ولا مجير

..

ماتفرحوش صدفة اتنفختم

واعز منكم فرقعه سوء المصير!

*

• أنا باعترف إن نفسِي

كان عليكو ثقيل ..

وحضوري لَمَّا أهْل

كائنَة طلّة - فيل.

لأن طبعي اما اجامل

مايطاوعنى لسان..

واقول فى وش الجبان

دمك غنت ورزىل .

..

عيبي انى كائن طبيعى

لا بقرون ولا ديل .

*

• كلّهم ماتوا وانا ..

(مازلت أمشى..)

سابقاً فوق رؤوس العاجزين

طائراً فى قلب نعشى (!..)

لا هى دى مصر اللى كافحنا

لحرية وجودها ..

ولاهمّه دول ولادها

الأوان لسّه ما أنشى..!

..

التاريخ مازال قالقتى

نفسى أخبيها فى رمشى..!

*

• باكره حروف إسمى
لو طقت على لسانكم .
واقلق إذا صورتى
طلعت يوم فى جرنالكم.
ياللى عما اقلامكو فضل
الحاشية والأذنان ..
وطبعكم عاب
وفسد الكذب وجدانكم
..
حضوركم وغيابكم
ترابيس عقل سجانكم ..
*

• أهل الثقافة اللى
انت يا بعيد منهم ..
ساقوا الهيافة
وصار العقل بيشينهم ..
من يوم ماشبطوا
فى ديل الكاكى والقفاطين ..
مرض الغرض نلهم
والدين عورَ عينهم !!

..

واللى سلفهم تلف
بكره ما ح يعينهم!

*

• كفاياك يا ابو الهم
وهم صحابة و فراعنه.
ماعادشى فيه حلم
قادر تانى يجمعنا.
من يوم ما ابليس حكم ..
فى مصيرنا واتحكّم..
العقل بلم
ننام ونقوم بأوجاعنا
..
حتى الاله مابقاش
له نفس يسمعنا !
*

• ماء الخجل خف
فى وجوهكم لسوء نيات
الكوثر العذب
جففوه خوانه ..ومات
والنيل ما عادشي
سواد العين ولا الكوثر..
فرعون تجبر وردمه
سياحة للخواجات..
..
من أجل يبلعنا
أولاد موسى والحيات!
*

• ياللى انت دلك غبائك

نزلت بحر الزجل ..

بلبظت لخبظت وكتبت ياما

من غير تحس الخجل

كافة قوافيك هريسة

بخلطة السلطة..

تسوق علينا الأونطه

و تسوق علينا الهبل

..

لافيه حداك موهبه

ولا فى عندك خجل !

*

• كدبتوا وسرقتوا
عشتوا عوالة ع التنظيم
وحسبتوا تمن الكفن
للثورة بالمليم
بعثوا الشباب البريء
تاجرتوا فى جراحه..
وكنتموا أظلم
من الظلمة على المظالم.

..

ويوم الهزيمة
لهفتوا نصيبكو فى التقسيم.

*

• أنا بكل افتخار المصرى
من اليسار القديم..
من اللى سال دمهم
من قسوة الشوم اللئيم
واترمطوا ف لؤم التجاهل
والجلافة والتجنى..
واتمسكوا بحبل التمنى
لنصرة العقل السليم.

..

اللى لو يرجع سلمنا
أو يسلمنا لزبانية الجحيم!

*

• فيه ناس على نيّة
تسرق يصبحوا محابيس
وناس علانية
تلهف خزنة السرفيس!
تسرق رغيّف الفقر
تقطع النفس..
تسرق وطن بالقهر
تصبح رئيس!!
..
بعقد شرعى ورضاها
أمة المتاعيس!
*

• محبط .. وقاتلانى غل

هموم تباريح الفشل..

أنا اللي عشت أكحل

الدنيا بتفاريح الأمل..

ليه يا صديقى تصيبنى

عمد فى مقتلى..

تدوس فتهرس مفصلى

ترمينى من فوق الجبل

..

لكنى عمرى ماندمت

لحد ما يحين الأجل..

*

• بالإغتيال بانتخاب
بالورث باستفتاء.
الابن فوق عرش ابوه
يرقد بلا استحياء.
يالل انتوا فاكرينها لعبة
حظ ومصادفة..

على قفاكم قليل
صك ألف حذاء

..

عصر الهزائم عايزكم
ضحايا يا مش شهداء!

*

• الحرب الأهلية
بتشعل نارها فى ضلوعى
لا انا قادر أطفئها
بدمى ولا اغرقها بدموعى
ضعفى مبرجل صفى
قدام أمراء الحرب..
أولاد الزمن الكرب
اللى قطعوا صوابعى شموعى
..
وانا ظنى إنى بخيبتى
لساى مناضل وشيوعى
*

• غلبتوا علينا المش بدوده
ورخصتوا الأحلام.
إحكى لنا شوية عن
أموال (الأممية) وبلاش أفلام.
الثورة زمان كانت عايشة
ع اللي (بيحرم ع الجامع!)..
كانت مستغفية
بدرج المكنة بتاع الأيتام.
..
لما ركبها مليونيرات النكسة
إنكسرت زى النسوان!
*

• يمكن يكون الوطن
كذبة فى عُرْف البعض..
ويسألك بعضهم رأيك
ماتلقاش رد..
فتقرا كتب التاريخ
والحروب وتقرا القانون ..
تغرق فى بحر الجنون..
لا تطول سما ولا أرض..
..
من غير خيال الفنون
مالناش لاطول ولاعرض!
*

• تجنبنا للخجل
ارضيت جميع لاطراف
وتحسباً م الهبل
بقيت غبى وخوآف
وبين الخجل و الهبل
ضاع الدليل منك..
القاضى شطب القضية
ولا مين درى ولا شاف.

..

نشفت عروق الأمل
يوم حكمت الأنصاف!

*

• أدى انت عشت العمر
دا كله وما هدأت حركتك
عبرت ياما ليالى
سودا ولا جفت شجرتك..
احذر دياب الفلا
وارضى بما نايك..
الموت أتى يدق بابك
ولا ختمتش ورقتك..

..

داء الرضا اللي أصابك
غيم على نور بصيرتك

*

• عتبك على مين
إذا كان الأمين خانك
والقاضي خد عرقه
من دمك ودكانك
اللى انت لحنّته نشّر
واللى شوفته سراب..
فى سوق كلاب غل
بتقرمش فى وجدانك!
..
يا نيل يا سيل دمعتى
نبلك فى احزانك!
*

• حسن الختام يافتى

ظبط موازينك..

مش قد يجوز فيه إله

رحمته تغفر مجانينك..

والآ الزمن ده غبى

وقبضته طرشه..

وعيوبه فارشه الغباء

أخرس ميادين!.

..

واللى سرق كل نبق

سمم خيال طينك!.

*

• حبوب نكد فى الصباح

وحقن كمد فى المسا..

وحاكمها ضارب طبنجة

وصحته كويسه.

ياللى خلقت البقر

تتغمى فى سواقى..

إحرمنى ارضى وسمائى

وإنا اسخطنى خنفسه!

..

أشرف لى .. ولا اشوف

رقبتك .. يابلد ترمسه!

*

• فرآش غشيم النظر

لوشاف لهب ينجن.

ينسى أصول الشرف

أو ينسى شرف الفن

لأنه متربى على طاعة

صحاب الأمر..

خوفا من الفقر

رعبا من هواه ينجن..

..

فيموت فى لهب الشموع

متكفن بسوء الظن !

*

• قلب الأحبة
زى قلب الطير.
يقطع مسافات الهوى
مشاوير..
أنا قيدت لحبيبتى
نجماية على شباك..
وهج ضياها رماها
فى شباك الغير
..
قلبى الكسير اکتفى
بالعشق فى الأساطير
*

• هذى بلاد الهلس
لاتضحك يا متنبى ..
ضحكت حتى بكيت
وياما القلب متعبى
تاريخ من الغلب
مالوش فى الغباوه مثيل..
لو تسأل النيل بكل
صراحه لا ينكر ولا يخبى ..
..
ويعترف فى غباوة
كل دا ..ذنبى!
*

• ما بين الناقد الغلاوى
والمتشاعر الدحلاب.
نياب الغلّ حاصرتنى..
بلا عزوة ولا أصحاب.
تربص جهلهم بيه
فسهّونى ونهشونى..
لولاها حره موهبتى
مرارها ضرّس الأنياب..
..
يضيع الشعر لو طيب
إذا حكمت ضباغ الغاب.
*

• عالمٍ عديم العدالة
عملت منه جليل..
وورده دبلانه عاقر
عملتها إكليل..
كان فين بصيرتك
وكننت البكر والغاوى
شيلنا معاك البلاوى
ماتقولش حظك قليل..
..
قدرك كتبته بيدك..
عشان ماكنتش دليل
*

• أشعر من الجن
بعض الإنس أحياناً
وشوف بديع أو فؤاد
موتى و صحياناً..
وشوف ولاد الحكومة
المشعورين خيالات..
خلفة زمن قحط
رسم الدودة ثعباناً..
..
وعين ابن اللئيمة
(الدفعة) - قبطاناً
*

• من بدرى شايلى همومها

ليه ابتديت تزعق..

وأملك قالت لك زمان

إخترت لا تزهق

هيه كده الدنيا مين يقهر

سواه برضاه..

تعذبه اللاه لكنه

بصدق لا ينطق..!

..

عمره ما يرفع جباه

وف قطرة مياه يغرق.

*

• جاى انهاردة بتبكى

خيبتك الكبرى..

وانت شايلها حمول حيّة

وهموم ذكرى.

بلا نيّله - هيّ حياتك

والزمن فاتك ..

ولا علمكش تصدق

فى حياه أخرى..

..

لذا شبّه أمس لازم

راح يكون بكره ..

*

• العقل غايب
لذا هرب الخيال منكم .
تراث نميمة قتل
طيب النفوس بينكم .
واللى بلعتوه صغار
بتطفحوه شيبة ..
شايقينها عيبه سواكم
والعما عيبكم ..

..

بعتم سنين النضال
ما سددت دينكم ..

*

• بتربى دقنك بقيت
تشبه حفيد أبو جهل ..
وانت حفيد الفراعنة
ولك منهم حضارة وأهل..
تطلب وداد الجمال
والنخل و الأنعام..
وتحسب الخيبة بالوية
و الأحكام بقلّة عقل..
..
فك اللجام عن عيونك
العبط مش سهل!
*

• ما احلاه حنينك

حين يكون م القلب

حتى لزمان قاسى

حزين أو صعب

قلب البشر معجون

بماء الحنين

وده الى يفرق

بنى آدم عن ابن الكلب

..

حتى ولو كانوا صحبة عمر

نفس الدرب.

*

• بينى وبينكم سنين

من فقرى مانسيتهاش

بينكم وبينى سجون

قهرى الى مابتفناش

سجانه كتبه ودكاتره

مخبرين شعراء

بوشوش أليفة بغباء

مخبيه غيلان وحناش

..

بعتوا الوطن كاش

وسكرتم بدمى بلاش .

*

• ارفع سيوفك يا عنتر
واديها كرباج ورا..
جهزت مضارب عدن
لرحف مكة العامرة
إيه اللي باقى عشان
أم المجازر تكون..
ما باقى غيره جنون
آخر عصور المسخرة ..
..
حلت نهاية الزمان
المجد لآم القرى..
*

• معروف بأن البغل

خاله حمار

والكبت لازم

يولد الانفجار

فهمت لما ركبت

ع القمه..

إيه بعدها يا فسل

غير لانحدار؟

..

مالهش حق اختيار

اللى صعوده انكسار

*

• اياك تشحت معروف من شخص

صغير ح تصغر روحك

دماك فى عروقك ح تعكر

أكثر تتعري جروحك.

وح يفضل خسه نفس

شايها لك ويذلك بيها..

حتى لو كنت ناسيها تلاقيا

فجأة بتشعل قش سطوحك..

..

كل صغير عنك شايك منك

و بيتمنى يهد طموحك..

*

• يا نقطة الدم
يا ناشفه على توبه
هوّه ضحية ظروفه
ولاً مكتوبه
من صغر سنه
شطح بيه الطموح فرماه..
صور له يقدر ينول
أحلامه بهروبه
..
ح يكفنوه حين يفوق
بعيوبه فى ذنوبه.
*

• ركبت جسد النسا
وكرهته جبال وشطوط
ولا عاد ما بينه وبينى
إلا صمت الصوت
عملت ايه يا عديم الأنسة
فى حياتك..
حرمت ذاتك طموحها
لسدرة الملكوت
..
وما عادش باقى لقلبك
إلا حد الموت !
*

• هوّ احنا يا صاحبي بينّا

تاريخ وتار بايت

كل اما نتقابل تخربشنى

بلسان فالت

من حقه بس اللى دمه سال

يحاسبنى ..

حتى ابنى مالوش يعيينى

والميزان فالت

..

إيه ذنبه من لم يمت

يوم ما الرّمم عامت.

*

• فى نفسى شعرة مرارة
منبئة وسارحة..

أشواكها من غلب شعبي
وقهرته الجارحة .

جدورها نكران رفاقى

وغشم زمانى القديم..

وبخنى خالى النديم .. قال

بلا هلفطة .. ديتك فرحه.

..

تقطفها من زهر شعرك

وجنته الطارحة

*

• خارج لحضن الناس
بقلبك برىء
ساعة زمن واتهرت
م الزغد والتشليق
ساحات طفولتك بقت غابة
وحوش مهابيش..
لا عرفت تغطس
ولا قادر على التحليق
..
قصيت خرابيشى
قصقص ريشى كل دنىء
*

• عجيبة طبع الشجر
يابدع تماخيخه..
تأمله بحب
يكشف لك تواريخه..
كما بشوق الحياة
يرحل لضوء الشمس..
يطلق إذا حس
زحف الموت .. شماريخه!
..
عشق الوجود نبض
نخله زى بطيخه!!
*

• سياسي أنا علّمني الشعب
إني اكون حزب بشعري
ماليش مجلة وشلّة وعِب
ولا ف جهاز يرفع سعري..
عشان كده عاشق وباحب
ونكدي غضبان طول عمري..
أشب بعصائتي وألب
لذا محيرهم أمرى..
..
ورجلى حرّة فين ماتدب
يتعلموا العشاق صبرى.
*

• حاسس بمصر ح تصحى

يوم على قنبلة

لها فرقعات متشنجة

لا تخلى كوز ولا سنبله..

هوّه انتو مش حاسين هزيم

رعشة أزيز التوصيات..

أنا سامعه فى قهر السكات

وتحليلات الحنجلة..

..

ماعدش قادر ربنا

نفسه يحل المعضلة..

*

• مشايخ نقاد الدولة الأمنية
وقفوا لى طابور..
حاصرونى من أول بنت النقاش
لعصابات فضل وعصفور..
يقولوا لى من سوء نياتك
يطلع لك فى كل خرابة عفريت..
لذا جيت لبتوع الشرعية
يمكن مرة يصيبنى الدور

..

ويفكوا محاصرتهم ليه
يا بلجنة يا جايزة يا طرطور .

*

• تفكر بحزن وألم
فى اللى فات تكتئب..
تفكر بفرحه وأمل
فى اللى جاى تنتحب..
فى زمن إنتحاب لاكتتاب
أوعى تكبت مشاعرك..
قوم اضرب بشعرك
بروجى نهاية العرب..
..
دمانا فى عروقنا
مسمّمها كذب الأدب.
*

• اللى سندك ياما
فى بداية حياتك..
لما كنت ضعيف ونكره
ف حد ذاتك
أخذ بإيدك بالحنان
ماعملىش سيدك..
ولا مرة أتخلى عنك
حتى يوم القطر فاتك
..
ليه بماء الغدر
تغسل امسياتك!
*

• أنا رغم أنف اللجان
مازلت رب الشعر
لابقيت رئيس مهرجان
ولاوزير يا جعر
الفن جوهر وجود
وكرامة الانسان..
مش سرج لجل الحصان
تكرّ بيه وتفر..

..

مع انه فيه فى تاريخه
فرسان تاريخها يعرّ!

*

• انا كنت (مجرم حرب)
شاعر ملّتى الحرية..
انحزت للفلاحين و لحضرة
العامل وحلمه باشتراكية..
لذا جرسونى الأكاابر
وجردونى العساكر وانشطب اسمى..
ومسحوا رسمى الجميل
من جدول الوطنية..

..

فينه محامى العدل يا وطنى
أوكله فى القضية!!

*

• اشمعنى انت اللى كان..
مش راح يخيب أملك..
لاكنت من دون عبده
عليم بيوم أجلك..
لا انت اليتيم المقدس
ولا بدوى بيوحى إليه..
مش عارف إمتى وليه
ينقح عليك زجلك
..
أتقنت سحر الحروف..
زوقت بيه دجلك!
*

• أصل البشر بذرة
بالبطيط زى الشجر..
لو تعرف الطين تنبت
يحييها ضى القمر
تحسه تحبل أكم
بالزهر والألوان..
يا خوفى من إنسان
يجف من غير ثمر
..
يموت حطب فى مكانه
من غير أمل فى سفر.!
*

• وكأنى صبارة وحيدة
زرعتها فى الصحرا الريح..
يروئها عابر سبيل
أو عاشق غريب وجريح
لكنها حين تزهر
لا يبارئها أحد..
إذ جدرها حين صمد
صار للشريد تفارئح
..
وئها فى لهب الشمس
ئخفف التبارئح..
*

• انا ليه محمّل نفسي
كل هذا الجنون..
مع إني شاعر على قدي
وأكيد مجنون..
عشقت أرض البلد دي
رويتها بدموعي ..
كأن زنازينها عملت
من ضوعي سجون
..
ورغم هذا غفرت
كأنه كان أفيون!
*

• م النبقة للمشمشة
للخوخة .. للرمان..
ياما كنت باحسد
جناين الورد ع الألوان
واما كبرنا وصيرنا
نقطفة وندوقة..
أسكرنا ذوقه
صبحنا نبكى ع البستان!
..
يا زارع الخضرة عود
روحي ع النسيان!
*

• ثلاثين سنة والثقافة

تمره بين أسنانه ..

يطحن عظامها بضروسه

ويتذوقها بلسانه..

لحد ما اتروضت وطال

خرابها الكل..

وهو زى الفل

بيدلع فى نسوانه..

..

حتى مدامع عينيه

مارويتش وجدانه!

*

• بتدور فى قساقىص
الايام عن دورك ..
وانت اللى كان الزعما
بيعملوا ألف حساب لحضورك ..
الماضى بيبهت فى دفاترك
زى ما بهتت صورته للتانيين ..
ح تفكر مين؟ ولمين تتذكر؟
والكل لحد الوقتى بيتكدر لظهورك!
..
فاقنع بما إنت عليه
وكفايه عليك الاحساس بشعورك.
*

• تسلّم يا سيد ندا
وتسلّم م الألم رجلك
حملت جبال من هموم
مند ارتحل والديك
ورش وزنازين سجون
ومنافى وعناير..
ولسه قادر بتروى
حلمنا .. بكفيك
..
بيخضرّ .. تانى ويرش
الأمل حواليك
*

• أكبر من النملة أكيد
ويمكن اكبر م الجمل
لكن مؤكد ماهوش اكبر
من الخيال والأمل
دعيته يرحم دموعنا
ينهى الحروب والمآسى
لكن أكتشفت انه ناسى
وانه مالوش فى الزعل..

..

ياللى مترصد ذنوبى
قتلنى كتر الخجل !

*

• شرط الحقيقة البسيطة

هدوء وحسن الأدب..

لكن الجدل بالزعيق

بذرة لسموم الغضب

كافة ماقاله بشر

قابل لكل العيوب

وبرغم خوف الذنوب

للكدب مليون سبب

..

واقرا بعقل كتابات

خرافات شيوخ العرب

*

• مازلت بحلم أغنى
لمصر والحرية..
برغم حقد اللصوص
ع المش والطعمية..
عشان مازالت بتشحن
عقول الفقرا بالأحلام..
عشم يعود الوطن
وتلمنا الطبلية..
..
وتانى يبقى المدمس
مطمع الحرامية.
*

• بقى كل حلمه يموت
فى جنازة رسمية..
فحرق كتاب الوطن
وسبّ لاشتراكية
وساب صحابه القدام
تاكلهم .. العتة ..
وعمل حاجات شتى
بخباته وسوء نيّة
..
ونسى ان عطش الدما
ماترويهوش ميّه!
*

• إيه عملت نكتة (نوبل)
لمبيدات البشرية..
غير حفلات ذكرى
وكوكتيل للنخب الثقافية
أشرف منهم فلاح رغم لصوص
الأرض وحكامها بيزرع أرضة..
ورغم وضوح الوهم مازال يعمل فرضه
أسير الخرافات الوهميه..

..

اللى ملوثة أيامه
وقاتله ف أحلامه العزة الإنسانية!.

*

• الكل باطل يا ولى
وكلّه قبض الريح..
قالها الإله ربنا
لنبي وقلبه جريح
وحفظها عنه الحوارى
وغيرو قصده..
مع ان رصده لما خلقه
حقيقى صحيح..

..

والا مازلنا ليه؟
بنعذر بعض كالتماسيح.

*

مع تحيات
دار ابداع للنشر والتوزيع



مدير الدار / عادل امين
تليفون ٠١١٥٥٠٥٠٠٨٩